

Мана школин политехническ сургъмдж

Сургъулин күүкдт политехническ медрл ѳгтхә гисн партин болн правительствин заавр Сарпинск района Оброчна дундин школд күүцәмджтә кевәр кегдджәнә.

„Степной“ совхозин гардачнр мана школд сургъульчнр дасхкд бүтн 2 трактор, төмр керчдг 1 токарн станок, дархна күүц олн зүсн зер-зев, электромотормуд, передвижной 1 электростанц, модар урдг мастерскойин зер-зев, тәрәнә сеялкс, эрдни-шишә тәрдг „СКГ-6“ гидг сеялк болн нань чигн машид ѳгв. Эн хамгла шугталань сургъульчнр таньлддж, йовулдг, залдг дасцхав.

Эн джил мана школд производственн бригад ах классмудин 47 сургъульчнрас бүрдәгдв. Эн бригад 3 звено болдж

хувагдад, оданас авн намр күүртл совхозд кѳдлмштнъ нѳкл болхмн. Шидрә болсн производственн хург деерән сургъульчнр иим даалгъвр авцхав: 100 гектар эмнг газр хагълад, эрдни-шишә тәрдж ургъагъад, силос кех; 20 гектар газрт бас эрдни-шишә тәрәд, буудя авх; 2 гектар газрт альмн, кедмнә сад тәрчксн, терүүгән хәләдж ургъах; 100 толгъа шову авч хәләх. Сургъульчнр дундас бригадир болн звеньевойс шиидгдв.

Авсн даалгъвран лавта күүцәхәр нег дуугъар сургъульчнр шиидцхав. Цуг эн кѳдлмшән эклчкв. Зундан кѳдлмшин цагт сургъульчнр бәәх вагончикүүд болн хот кедг гермүүд чигн совхозас ѳгддджәнә.

С. КОЗАЕВ.